

671.1238
078
120

卷四十建置志九
寺觀附上卷四十
一建置志十寺觀
附下

永平府志

永平府志卷四十

建置志九 寺觀附上

隆教寺

一名草堂寺在府城南一里明洪武初僧吉岩建景泰五年勅賜寺額設僧綱司於內久圯

國朝順治六年都御史蔡公士英捐資重建規模壯麗置藏經一部建高閣藏之水陸諸像繪畫精絕爲北

平第一

名利

府學訓導天津梅成棟秋日登草堂寺藏經樓詩云消此胸中悶閒登眺遠樓林凋山露骨雲截樹平頭遠碧天如夢新黃草變秋故鄉杳無際南去羨扁舟

譚允謙隆教寺詩云雪晴山寺趁朝登老衲相迎挂一藤鴻附尺書臨玉塞馬馱梵冊自金陵來同陝右棲禪客還問江南結社僧鄰廟尙存飛將在幾誰敢恃射雕能

開元寺

在南臺山頂明永樂七年僧洪聲建今呼南臺寺

國朝萊陽宋琬初夏同楊九章太守王心任郡丞宴南
臺寺詩云孤臺縹緲俯長河參佐追陪到薜蘿黃鳥
鳴時煙樹合白鷗飛盡夕陽多渡頭吹笛聞漁唱月
下烹泉試茗柯此日接離須倒載莫教歸騎促笙歌
王金英登南臺詩云天風吹我此遨遊一度登臺一
度謳領略煙光朝復暮徘徊杖履去仍留羣峯疊起
趨龍塞二水交流到虎頭故國
山川春夢裏攝衣如上閱江樓

李斐章南臺寺詩云野寺高臺上登臨感慨生河流
經絕塞山勢抱孤城破竈殘僧去長廊落日明空階
餘老樹時有怪鴉鳴

張元遊南臺寺詩云琳宮遙指問山靈勝日登臨蠟
屐停返照平分秋澗紫晴雲高壓晚峯青香燈杳靄
留禪榻花樹扶疏散客亭試倚
雙林舒遠眺幾行鷗鷺下沙汀

豐潤魯克恭南臺寺詩云城郭看如畫巉崖碧四圍
松濤寒作雨柳黛淺描眉怖鴿衝簷出山僧荷鋤歸
驚沙河北起又見馬
蹄飛自注時方較射

盧龍辛大成登南臺寺詩云著來雙不借拾磴古招
提地接灤江近山迴孤竹低雄風生大壑落日滿長
隄弔古情何極

蒼茫塞草迷

臨渝蘭土元九日登南臺寺和郭廉夫韻云恰喜無
風雨登高寄興豪城包羣樹暗河避斷山牢雁字秋

千里漁船水半篙唱酬

詩有料何必定題糕

樂亭張九鼎登南臺寺詩云尋勝忘途遠穿雲到寺
門寒山青客眼秋色瘦詩魂碑缺文難讀僧貧佛不
尊禪房堪小憩

歸去近黃昏

又張山攜同人由隆教寺至南臺寺振衣庭詩云出
城爲遊山遊山從寺始山中復有寺相隔尙三里偶
然得一徑卻入空翠裏梯屨踏亂雲觸足石齒齒路
狹人貫魚峯迴磨旋螳前幾踏後肩下乃承上趾俯
仰相招呼攀頓暫憩止賈勇造極巔城垣落足底下
視接蒼茫羣山爭拱峙險過境始奇驚定心方喜有
庭名振衣喘息供徙倚座上見征帆風生灤漆水筋
力疲來途欲歸氣先餒靈運興固豪退之哭有以甘

作退縮人先行謝諸子諸
子指示余落日燕支紫

雙泉寺

城北二
十里

龍泉寺

城東一里明洪武二
十六年僧源就建

郡人白瑜重修龍泉寺碑記云營平城東古刹名龍
泉創自洪武數頽數新至萬厯頽益甚僧定期飛錫
來秉心募化敝衲徒跣祁寒不爲侵鄉官廖汝南等
感其虔多檀施若天王殿大雄殿觀音閣伽藍祖師
皆因故址飾之增塑羅漢丹堊輝映肇於十八年迄
二十七年事乃竣伐石句余文碑焉余昌黎後學昌
黎一表方之禹功踵者閉關距之不啻華戎余獨不
非而與之乎噫嘻非佛者非非佛非奉佛者之非佛
也白馬以降迷所司南擊影捕風同室爲敵約者守
吾宗離見解而求之寂有寂則有住住非佛博者張
吾教外性命而求之迹有迹則有相相非佛空中贊
美塔邊放光借寓言以爲說鈴總之常在常滿常自
光明耳詭異非佛甚則雜市混俗捨身然指射利釣
名欲愚人而先自愚亡怪世稱五橫而厠沙門於其

閒乎而聖道中天謬謂一花五葉殊途同歸誣也佛
化西極猥以諄訓立來酷罪高曾誣之誣者也吾嘗
觀若黨一舉頓諸體備圓覺爲最上乘者似難其人
亦有抽簪剃髮襟宇高軒湛禪師於絕境揚微言於
慧門脫世故於樊籠蔑人榮於塵垢驅策遠途期階
大道安得以薰蕕溷之此何異患頭而首欲弁焚痛
足而股欲弁解也不亦冤哉經有之心生則法生法
界惟心造是心也幹天協地壽國脈遂民生原非幻
景卽心卽善卽善卽佛一念發菩提心卽證菩提它
如五戒八難報應諸經匪事迫憊不過開此羣迷登
之善路名教而外未必非利濟之慈航也不然香積
上方投足是買櫝也而竟不問珠祇重叛倫毀形之
罪耳且佛在諸天不習有爲跡墮落寶地梵宮宛轉
鏤刻閒亦何樂口伴尸肉永貽訾繆也於是定期遠
坐頂禮唯唯而去

萬曆二十七年

天津梅成棟獨遊龍泉寺詩云不欲人相識幽尋古
佛堂郊原初放眼林木已新霜石髮通身綠山花透
骨香自行還自止留戀此秋光

勝水寺

城北二里

臨河寺

城北十里

白塔寺

城西八里元建

古興寺

城東八里

白蓮寺

城西二十里泥溝

青蓮寺

溫泉寺

城北六里

興隆寺

迎恩寺

城東北二十五里

雪峯寺

城南二十里雪峯島

李士模雪峯寺迴舟卽事詩云薄暮垂山靄中流落
照紅舟行蓼影上人語水聲中蘆酒堪遲月絺衣不

耐風隔林燈火
近歸路響秋蟲

樂亭楊在汝舟泊雪峯寺下詩云前路暝煙稠蒲帆
傍岸收鐘聲山寺晚漁火大江秋夜久霜侵幔天寒

月入舟曉來紅日
上盪槳起沙鷗

樂亭張鳳翔舟過雪峯寺詩云輕舟過處水溶溶兩
岸山光擁萬重層疊僧樓深嶂裏西風吹下數聲鐘

白雲寺
城北三十里安山元
時建正統勅賜寺額

白蟒山寺

遷安馬恂重建白蟒山龍興寺碑記云蓋聞法輪如
日照華藏而騰光象教若雲布恆河以散影斷情河
之水叩鉢龍居低寶樹之枝臨池牛熱三藐三菩提
眞實相惟波羅密無我無人相善知識徧閭浮提斯
伽藍護德表蘭若於靈山彌勒同龕種蓮花於火地
也爰有禪林奠於白蟒嗅溪水之香是宜建寺問錫

環之卓猶記開山是故創於前代額以龍興夫其黑
蜺飛神蒼蚪拗怒衙衙布應龍之翼巍巍蟠神螭之
精宮中翻轂疑廣利之談經井底潛麟豈志公之造
懺則巒岫走於長蛇岡阜吞於香象斯山所由名乎
抑寺所由肇乎啟羅什之談經來白馬滴曹溪之乳
水抱青龍廣長舌與清淨身宜山宜水妙明心叩修
羅杖證月證風誠甚多之福地爲不墜之精藍然而
浮圖已故誰是岳陽王鐵佛旣堅猶遲平等閣則興
廢者時也時固無損於色空振修者人也人乃自深
其願力旣入寶山定難空手各求實地惟在信心有
大善信永亨靚丹青之彫煥慨金碧之無恆蒼鷄無
圖芻尼巢座金鳩滅影撲朔穿墉青松寂歷空枝非
鸚鵡之林紺殿蒼涼荒徑想獼猴之舍乃有動於中
力圖其始而住持慶潔上人亦復竭力助勦隨緣募
化傳大士拍板而歌法情是優婆塞給孤獨布金以
建福德過阿祇僧而虎跑神運儼萃於其旁鳥革翬
飛大逾於其舊尊嚴釋家之寶相眉毫光普照大千
開闢羣提之眞如心法門同歸不二參遍黃梅道路
之石頭不滑勤修白業樓臺則彈指皆成當前著棒
喝看鴨任扭住鼻頭隨處是道場騎驢莫多生口角

則有有無無之際新古寺以鴻鵠而如如等等
之真鎮名山以鸞峙矣道光十四年甲午仲夏

萬軍寺
城西北二十里

雲水寺
燕河營

清涼山寺
城西清涼山

觀音寺
一在城北四十里劉家營
一在城西五十里無稅莊

大窪寺
城東十五里

九天觀
城東門外

元都觀
城南關外

三清觀
獨子山

觀音堂
一在府治南
一在燕河營

觀音閣

南關

大佛堂

崆峒山

三教堂

楊家莊

白佛院

明郡人韓應庚重修白佛院寺碑記云夫永平迺畿輔重郡也郡城正西二十餘里大道南向有白佛院寺衢通京遼位正坎離北望孤竹東環灤水俾來向矣繼是以往正殿一座左右兩廊各一間大門一座住房三楹鐵鐘一口茲則中范以佛像東廊三護法西廊地藏王周圍以垣墉歲禋祀焉及今正殿兩廊大門並四圍垣墉頽壞時則住持高僧圓惠敬詣同莊省相張君嵩蕭君永明環視駭然病其頽圯太甚無以嚴祀事示具瞻也遂相與協議涓辰卜吉鳩工庀材各捐資給粟或募緣助緣正殿兩廊大門之頽壞者壯麗之住房之隘陋者增崇之垣墉之圯折者補葺之規模恢宏氣象光大煥然一新視昔有加非

特可爲揭虔妥靈之所及居者行者往過來續莫不
仰其廟貌之森嚴動其欽承之念慮善因以勸惡因
以懲有所必應咸胥賴焉是役也蓋經始於萬厯癸
巳春之吉而落成於萬厯甲午秋之辰此固神有所
感人有所應僉益信其爲護法之靈神也工旣告竣
邑鄉省相張君嵩屈士王君濟民靡不樂俛成工之
速且欲不忘諸善人重修之功合辭走幣徵余文勒
石以垂永久予告來者曰德者福之徵福者德之致
自古記之矣矧上古會云金像夢於漢帝祥光見於
周朝是言也豈徒空弊哉一以因人之修德以致是
耳易曰積善之家必有余慶此之謂也苟費自修俾
德於身顧徒望其福之致於神及福不致而曰神之
冥冥不我鑒也此又倖福於回者所爲也是豈諸君
協力崇神之初意哉夫佛者金像也重修者盛舉也
人人相樂以有成可書也故予嘉其請而不敢辭謹
記歲月並述會福之意以爲諸君告俾視此者知所
感云

遷安馬恂廣代上人重修白佛院碑記云蓋聞能仁
之爲宗也有平等心存無著心存無我相無人相無

眾生壽者相而總歸之於無心而總歸之於無無趙
州和尚念一箇無字是卽天龍之一指布毛之一吹
也無去無住故亦無佛旣無佛何有院旣無院何有
修宗門白惟城欲一叩然而何處非道場何處不可
騎驢何處不容唾地識得真無字則有有皆無無也
又何妨卽佛見院卽院見修卽修見無也廣代上人
住持夷齊廟聖之清者悟入深矣其中洞然而無物
不知寒暑陰陽之爲寒暑陰陽也其外浩然而無觸
不知興廢得失之爲興廢得失也其天者全其膠者
解雖未必一棒打殺釋迦牟尼而燒木佛取舍利自
有丹霞神通一空諸相故能卽空生相過白佛院而
感其墮廢非感於無院也感於無佛無空也感卽非
感感於無感也太虛空中著此一院一微塵中立此
一佛此意卽佛此意卽可白佛白佛而佛聞之乎白
佛而佛應之乎乃未幾而上人疾矣維摩老病不二
啟門阿難面皺識性不皺况釋迦牟尼文佛背痛示
疾臥雙樹中更說法要疾卽非疾疾而禱亦非禱也
以心印心以佛求佛我見不立諸妄自空於大光明
藏中認取主人霍然良已取常住物新我佛宇工鉅
費廣不覺其艱敗址頽垣中如華嚴樓閣彈指湧出

世眼觀之咸駭愕欽仰歡踴無量謂佛之靈也尋聲
救苦而已上人之劇疾上人之宏也冥感元通而成
白佛之大願亦無檀那亦無募化而千金之舉不日
成之誠慈氏之梯航法門之龍象也然吾觀上人成
功而不可厚施而不知院可新則新之力可舉則舉
之恆河沙不可思議功德與鄰虛有漏同因心心歸
空故心心歸佛其起無而使之有正舉有而顯其無
也四十年張弓架箭只射得半個漢誠得此意可與
上人下一轉語一切三千大千諸尊宿將歡喜作禮
而白佛言廣代上人是眞法乳是眞得無無第一義
諦因爲之頌曰如來西方土非可聲色求黃金布祇
園粉碎水上漚甚深微妙義佛言不可說眉間白毫
光大千俱照徹一鉢一蒲團我安佛亦安石頭路不
滑梅子何時酸平地起寶山寶山正平地唾手佛院
成卽此求子義蓮座七級高突作獅子吼佛眼
有見無世眼無見有道光十一年辛卯仲冬

洪福庵

城東門外

祇陀庵

城西北六里

觀音庵

府治東北

萬壽庵

城西北

普濟庵

小河西岸

福國庵

永興庵

縣治西

紅石庵

三慧庵

縣西街南與明遠樓對

太清庵

楊家莊

妙蓮庵

府治北沙河

白衣庵

劉家營

九蓮庵

城東十五里張家溝

國朝王金英遊九蓮庵記云郡城東十餘里爲陽山古陽樂水出焉其陰有小寺卽九蓮庵也同年友孟炎初嘗言其可遊而予未暇往學博丁遠亭曾偕同僚遊之句意若歉然未愜蔡夢堂聞之曰是未嘗造其勝耳癸巳八月晦日縣尉方君具壺榼相邀遠亭以夢堂之言乍疑乍信亦奮然從之益以學博李君處士蘇君凡五人並轡連鑣出郭外是日天氣清朗秋光如拭過驢槽村小憩由紅坡南入山山嶺起伏倏升倏降約五六里許至張家溝而徑漸幽紅葉離離拂榻簷諸君咸相顧色喜旣而攀磴而上林際隱隱見牆屋則庵在焉規模頗隘佛字三楹左右廂數楹而已山僧延入客座望屋後峯巒巍然予曰是可登乎僧曰否否予曰聞是有山水佳境從小屋穿出其安在耶僧乃導予輩行至則羣峯環拱萬松夾澗水聲潺潺起足下心目豁然蓋別一洞天矣遂於清泉白石閒各據地坐李君欲窮泉源獨傍崖迤邐行山石犖确不得道而返老僧攜茶果至遠亭向索象棋與李君對著蘇君從韡勒出紙筆作繪事予嗒然

且吃茶忽憶老友楊默堂侍御詩曰四海幾人成獨
契百年此石亦三生不覺喟然發嘆遠亭迴顧曰君
殆有所思乎予謂之曰人生蹤跡如雲隨風飄飄然
不可拘執予與諸君東西南北之人也忽而聚於郡
忽而聚於是山且居郡數載偕遊者屢矣而獨未嘗
至是山南臺非不可以眺遠也清風臺非不可以弔
古也而幽窅之至則俱不及是山是山在郡境閱數
千年曾無人亟稱之近日夢堂炎初稱之而言之不
詳要非身至斯地不能言之必詳也然而身至斯
地亦不能言之必詳也惟自得者心領之而已諸
君皆曰唯唯是不可
以無記故授筆書之

王金英偕丁李二廣文方少府蘇處士訪陽樂水於
陽山下得九蓮庵杳僻幽靜真仙境也欣題二十四
韻詩云昔我同年友結廬城東郊爲言陽山勝未至
心忉忉茲來尋水源兼以快遊遨跨出郭門迄行
果老槽勒轡過紅坡清流何滔滔引人漸入勝步步
登雲霄小庵構山麓翠峩羣峯包入門逸興豁穿室
趨山椒天開一片石平潔臨素濤松風鳴其上入耳
如聞韶彷彿遺世立頓令百慮消同人三五輩趺臥